

17 JAN 1998

MAHATHIR TEMUI SUHARTO MENGENAI KRISIS EKONOMI

JAKARTA, 17 Jan (Bernama) -- Datuk Seri Dr Mahathir Mohamad mengadakan pertemuan dengan Presiden Suharto di kediaman presiden itu di Jalan Cendana di sini dan kedua-dua pemimpin dijangka membincangkan krisis ekonomi yang dihadapi Indonesia serta negara-negara lain di rantau ini kini.

Kedua-dua pemimpin itu juga dijangka membincangkan rancangan Malaysia untuk menghantar pulang para pekerja asing bagi mengurangkan beban semasa krisis ini, menurut seorang pegawai istana hari ini.

Dr Mahathir yang tiba pada pukul 11.25 pagi (waktu Malaysia) disambut Suharto setibanya di kediaman beliau.

Beratus ribu rakyat Indonesia kini bekerja di Malaysia dan kebanyakannya di sektor pembinaan dan perladangan.

Dr Mahathir merupakan ketua kerajaan kedua dari Asean yang mengadakan pertemuan dengan Suharto secara peribadi untuk membicarakan krisis ekonomi sekarang.

Perdana Menteri Singapura Goh Chok Tong mengadakan perbincangan selama sejam dengan Suharto di sini pada Selasa. -- BERNAMA

KHY RON